

欽定剿平粵匪方略

欽定勦平粵匪方略卷二百二十六 己未年

十月初一日

丁酉

駱秉章奏言石逆敗竄粵西畏

楚軍速至過全州時不敢偪攻城垣竄踞興安
靈川兩縣於嚴關大溶江一帶連紮營壘以拒
援軍其僞國宗聶姓一股勾結粵西恭灌各賊
已先由興安靈川撲廣西省城當檄催蕭啟江
由全州趨興安收復縣城逆首石開達設卡塘

埠營百子鋪一帶大股屯踞大溶江八月十九日蕭啟江派兵分中左右三路前進敗賊於埔埠營追至百子鋪焚賊巢十一所沿途追殺斃賊無算惟大溶江對岸之賊尙與官軍相持各營並進奮勇衝殺賊勢不支紛紛奔潰是役往返百餘里出賊不意竟獲全勝大溶江之賊既敗埔埠百子鋪之賊亦走石逆時在靈川遂焚

所掠穀米向西路遁走二十三日由靈川甘石
鋪竄義甯縣龍勝驛一帶二十五日蕭啟江拔
營趨桂林桂林犍城之賊亦經蕭榮芳擊敗東
北聞已無賊惟西南路之賊尙屯踞如故二十
八日劉長佑拔營進至全州探報石逆竄至永
福並聞柳州之賊出巢應之平樂所屬及廣西
各股賊匪均有勾結合夥之意石逆去留蹤跡

雖尙未定然義甯永福可南竄柳州北竄黔邊
自應豫爲防範臣已飛飭總兵田興恕由東安
新甯武岡綏甯前赴靖州取道截勦探悉粵西
融縣懷遠一帶尙無外來賊蹤惟貴州之賊已
有山梅寨至柳州者或係邀約石逆入黔亦未
可知黔之北境卽蜀之南境尤當豫防竄突臣
當於楚黔之交設法截勦遏其竄蜀之路斷不

敢稍涉推諉奏入

上命軍機大臣傳諭駱秉章曹澍鍾曰石逆狡悍異常
既經湖南廣西官軍擊敗難保不勾引另股匪徒竄
往他處逆蹤靡定欲竄蜀疆必先取道黔省此時田
興恕尙未回黔著駱秉章卽飭該署鎮詳加偵探如
該逆竄往黔省務當實力截回毋任闖入劉長佑一
軍現已進至全州並著探明賊蹤前往追勦必將石

逆殲除以杜後患

初四日

庚子

和春奏言逆黨勾結擒匪聲言下竄

揚城接濟六合金陵等處盜糧九月十六日謀
報該逆大股山司徒廟竄至瓦窰埠圖撲揚州
郡城悍賊馬步數萬山西北至東南直薄灣頭
五臺山營壘逼近西北各門我軍堅壁登陴施
放火器斃賊不可勝計餘衆潰奔三汊河一路

馬德昭親督小隊馳至會台孔朝彪等三面兜抄殺賊無算其攻撲瓦窰埠之賊亦經馬占葵等進剿大創而回官軍乘勢追至劉家集地方復有大股憑河力拒又經轟殪數百名而甘泉山之賊於十七日糾衆西竄由小路繞道儀徵陳板橋距六合大營僅十餘里並分股竄擾紅山窰營盤二十日賊糾數萬人圍撲官兵寡不

敵衆致被攻陷查紅山窰係大營後路一爲賊
踞聲息中斷餉道不通臣一面撥兵兼程北渡
一面飛咨袁甲三飭總兵張威邦由清淮折至
揚城並抽撥前此派援淮揚之兵勇四千名星
夜折赴六合會同應援朱承先張威邦現已馳
抵瓜埠臣仍嚴檄各帶兵官迅速進兵收復紅
山窰營盤不准片刻耽延奏入

上命軍機大臣傳諭和春張國樑曰紅山窰係李若珠
大營後路一經失陷餉道不通現在朱承先張威邦
各軍業已馳抵瓜埠著卽嚴飭各軍奮力進攻前後
夾擊先將紅山窰營壘趕緊攻克以通餉道所有失
守營盤各員著查明分別叅辦

同日駱秉章奏言查楚省赴援廣西之蕭啟江
劉長佑諸軍已於八月二十八日九月初九日

前後馳抵桂林賊聞楚軍人至悉數由南路遁
竄城圍立解竄撲廣西省城者爲僞石國宗一
股至石達開聞尙踞義甯永福一帶廣西學臣
李載熙前奏賊匪遁至東安與其黨謀所向欲
暫取粵西以爲後圖不得則竄踞南甯爲再出
計疊據拏獲奸細所供大略相同而曹澍鍾來
吞又稱拏獲奸細賊意欲回竄江西彼此互異

而於石逆蹤跡皆未能確切指明亦未言援軍
急宜專注石逆或以石逆尙可緩圖而桂林之
圍必須急解耳所不可解者李載熙原奏係八
月二十七日拜發蕭啟江蕭榮芳均於二十八
日抵省賊已解圍李載熙近在一城何以先一
日拜摺之時竟無聞見乃以省城危急外援難
到情形入告致煩

聖慮僞石國宗一股人數雖多然屢經擊敗似亦無甚
伎倆蔣益澧已於八月初二日馳抵省城所部
蔣澤春等勇方自柳州調回布置城守已屬有
備無恐且逆首是石達開非僞石國宗援軍討
賊自應先其所急蕭啟江全軍旣已先赴桂林
以援省城劉長佑全軍現屯靈川擬先勦義甯
以除巨憝杜其竄往黔蜀之路至蔣益澧少年

氣盛閱歷甚少自以身經百戰頗習兵事每論
用兵事宜於僚屬多所凌忽臣早經慮及然廣
西一省除該員所部水陸各勇外實別無兵勇
可以調撥臣謹據實覆陳伏乞

聖鑒奏入報

聞

同日

上命軍機大臣傳諭和春何桂清曰近聞勝保以酒色
行樂不顧生民塗炭並奏報不實致勤辦皖匪日久
無功著和春何桂清派員密查據實具奏勝保係安
徽一路督兵大臣一時頗難更易著和春何桂清於
江南江北帶兵大員中擇其可以勝任者酌保一員
候朕簡用

初七日

癸卯

翁同書奏言今日可以定皖者惟賴

楚師官文胡林翼經畫有年慮勝謀定非浪戰
輕試者可比故遣將出征往往有功謀聞楚師
已破石牌將搃安慶之吭而拊潛山之背儻別
遣勁旅萬人間道疾趨英霍直搗舒城得舒城
則桐城太湖潛山皆下矣廬州堅大宜按而不
攻徐出奇兵以圖懷定牽賊之勢使不得東向
然後清江可以無虞皖境可以漸復此上策也

假如楚師轉戰潛霍間未能深入則先圖懷遠
勝保一軍爲明光賊勢所牽未必遽能西來傅
振邦一軍爲宿北捻勢所撓亦難悉衆南向苗
沛霖練雖可用卒以孫葵心耽伺其後未敢遠
出若資臣以豫省漕糧三萬石贖給苗沛霖輔
以官兵再由湖北督撫派驍勇敢戰之將引偏
師徑趨下蔡以爲聲援並請添置水師礮船浮

淮而下計百日內外可拔懷城既拔懷城則臨
淮鳳陽一鼓可下此中策也若二者皆不能行
則以勝保一軍攻復明光急檄李世忠一軍踰
清流關而入以保東路臣扼守壽州與傅振邦
關保互相應援制孫葵心劉添幅二巨擘用勦
撫兼施之策徐翦其羽翼以保西路雖未能使
賊大創或不至十分決裂此下策也若視淮南

一隅爲可棄徒以勁騎重兵畫淮而守臣恐淮南盡失卽淮北泗靈一帶亦難遏燎原之勢揆諸兵機是爲無策敬畫三策伏祈

聖裁奏入

上命軍機大臣傳諭翁同書曰據奏皖北糜爛已極敬擬補救三策不爲無見已寄示官文等籌議矣現在楚省援師尙無到皖日期該撫惟有扼守壽州與傅

振邦關保聯絡一氣互爲聲援暫保西路俟袁甲三到後會商進剿毋得株守一隅致成坐困

上又命軍機大臣傳諭官文胡林翼曰據翁同書奏皖北糜爛已極該撫一軍在淮潁之交與六安形勢相接如楚師騰越而入可以收腹背夾攻之效所籌上策與曾國藩前奏尙屬相符惟楚師東下節節進取尙需時日已諭該撫等力保皖境以待楚師著官文

胡林翼將翁同書所陳三策加以參酌咨商曾國藩
謀定後動務期計出萬全

初十日丙午和春奏言逆黨由皖北淮揚折趨六

合竄竄紅山窰橫截李若珠大營後路當與張
國樑商派總兵馮子材帶兵一千馳往紅山窰
總統各路援師相機攻搗並飭遊擊曾秉忠管
駕長龍三板戰船六十號駛赴段要口白廟一

帶江面停泊水陸會攻馮子材渡江相度形勢
派總兵朱承先副將張威邦田宗揚等分兵三
路護紮新營九月二十八日官兵築壘未竣突
有悍賊數股由紅山窰分途下撲山後復有大
股蠡擁而來時遊擊王希堂紮營河東見賊勢
甚盛點放大礮一時炸裂兵勇聞聲驚潰逆匪
乘勢兩面包抄所有紅山窰東路各營亦爲所

踞馮子材率眾扼守段要江口賊眾直壓江濱
曾秉忠連開槍礮轟殪逆黨數百名始行敗遁
方六合營盤被圍時揚防總兵馬德昭馳抵儀
徵探悉距儀四十里之陳板橋銅山直抵東溝
沿江一帶賊營聯屬當派兵團分投堵剿九月
二十三日敗賊於陳板橋二十四日敗賊於東
溝二十五日敗賊於馬鞍山共計踏毀逆卡三

處賊賊五六百名二十九日復分路進搆銅山
東溝陳板橋之賊因聞天長之賊屬集秦攔聖
家集一帶揚州兵力尙單當飭馬德昭統帶全
隊星夜回城將各處險要趕緊嚴密布置以固
北路門戶再赴儀徵籌勦惟是李若珠被圍日
久糧竭堪虞臣已檄令馮子材等探覓路徑無
論如何取道總須設法迅解重圍查總兵朱承

先副將張威邦田宗揚等先後帶兵援剿遇敵輒潰實屬庸懦無能總兵馮子材總統援師雖渡江甫及一日究屬調度無方相應請

旨將該員等分別懲辦奏入

上諭內閣曰逆匪竄踞紅山窰橫截六合大營後路經和春等派令總兵馮子材等援剿因礮裂兵潰致令紅山窰東路各營均被賊踞實屬援剿不力馮子材

著暫行革職朱承先張威邦田宗揚均著卽行革職
仍一併留營勦賊以觀後效

十四日

庚戌

翁同書奏言粵逆自竄踞霍山後分

黨於毛坦廠地方築壘屯踞屢經官軍擊敗其
膽已寒當飭營總常海副將盧又熊等會同六
合團練並知照已革知府袁懷忠帶所部勇丁
約期同進適聞湖北昌字營官軍有由英山來

霍之信臣又派遊擊馬昇平帶勇馳往六霍一帶相機夾擊惟是霍山與毛坦廠賊衆互相首尾欲攻霍山必先以奇兵直擣毛坦廠賊壘因密派兵練分路進攻我軍奮勇直前斃賊無數當將該處大小賊壘全行燒燬盧又熊等督率馬步兵勇團練一鼓圍城該逆不知我軍多寡跳城越濠紛紛逃竄我軍四面兜擊殺斃無算

已革霍山縣知縣王自轄已革知府袁懷忠亦
各督勇助勦都司陳忠守備馬陞選帶奮勇弁
丁首先登城該逆總在北門巷戰力守城圍經
馬陞衝入據住巷口陳忠砍開北門我軍一擁
而入逆勢不支乘亂開南門逃遁常海率馬隊
追勦袁懷忠伏兵齊起殲斃逆匪極多餘逆竄
向舒城乘勝追殺數十里踏毀沿途賊壘八座

當將雲山縣城克復共計生擒賊匪數百名殲
斃不計其數現飭盧又熊等跟蹤追勦進復舒
城已革副將盧又熊等前次破壘擊賊已著勞
績此次克復縣城均屬異常奮勇謹先行開列
仰懇

天恩量予獎敘其餘在事出力文武員弁紳團可否擇
尤保奏出自

鴻施奏八

上諭內閣曰逆匪竄踞霍山縣城分黨屯踞毛坦廠地方經翁同書飭令盧又熊等將毛坦廠賊壘攻破進攻霍山一鼓圍城殺斃賊匪無數當將霍山縣城克復著翁同書仍督在事文武卽由舒城進攻痛殲醜類此次尤爲出力之已革副將盧又熊著開復原官營總常海著賞加副都統銜都司徐邦道陳忠均著

以參將儘先升用守備馬陞著以遊擊儘先升川已
革知府袁懷忠已革霍山縣知縣王自籛均著開復
原官其餘出力文武官紳人等准其查明保奏

十五日

辛亥

曹澍鍾奏言逆賊石達開擁衆竄撲

省垣屢經擊敗該匪由義甯永甯永福陽朔荔
浦各州縣分道竄擾一股至柳州府屬雒容縣
中渡等處一股至柳城縣太平墟一股至融縣

長安墟一股至平樂府屬永安州及修仁縣排
底村蔣益遭率所部兵勇先由南路跟追該匪
屯紮荔浦縣馬嶺我軍營於鐵帽嶺與賊相持
時有檢斬賊遂向永安等處分股竄逸據獲犯
供稱石達開欲自柳州融縣懷遠及慶遠等處
趨黔入川僞國宗聶姓欲至廣東尙無定向石
達開往來賊營蹤跡詭秘等情查該逆節次敗

比其勢似窮惟擁衆尙多又復四路竄擾旣難
合圍兜勦聚而殲旃若分道並進則兵力愈分
愈單該逆本謀實注意於川省聞欲由懷遠至
洪江趨黔直達川省劉長佑蕭啟江深諳戎機
所部將士亦皆勇敢得力臣正與熟籌由融縣
懷遠一帶進兵繞出賊前再由雒容柳城一帶
包抄其後會合夾攻並飛咨略秉章令田興恕

一軍出境截擊布置既定而曾國藩又因合剿
皖省賊匪札調蕭啟江所部赴鄂僅留劉長佑
一軍在粵協剿援師一退恐賊勢又至蔓延惟
有籲懇

天恩飭下曾國藩略秉章迅速籌定仍令蕭啟江劉長
佑兩軍留於廣西合力剿辦以期迅掃賊氛至
曾國藩前擬酌留張運蘭一軍協防湖南現在

湖南大局既定毋須協防如將張運蘭一軍先
調赴鄂與蕭啟江一爲轉移則援皖剿粵彼此
不致貽誤似亦兩得其宜奏入

上命軍機大臣傳諭曾國藩駱秉章曹澍鍾曰廣西賊
勢非蔣益澧所能獨支曹澍鍾現分兵由融縣懷遠
帶繞出賊前由雒容柳城一帶包抄賊後爲會合
夾攻之計著准其留蕭啟江一軍與劉長佑會合剿

辦俟事竣酌撤回楚前據駱秉章奏張運蘭率所部
由衡赴郴卽飭由郴宜越境追賊急切未能更調而
皖境自廬州以北匪勢臨張曾國藩議分四路進兵
亦屬不能稍緩並須厚集兵力方能大舉深入蕭啟
江張運蘭旣不能刻卽回軍除調回李續宜一軍外
有無別項兵勇可調能否卽日東征著曾國藩妥籌
調派總期援皖勦粵兩無貽誤方臻妥善石達開逆

蹤廳疾趨黔入蜀急須豫籌堵剿田興恕一軍與其
扼於黔蜀之交不若控其奔黔之路著駱秉章飛飭
該署總兵探賊所向擇要防剿

十七日癸丑周天受奏言據副將吳正熙等稟報

石埭夏村踞匪分股糾合青陽之賊於十月初

一日竄入涇縣之查村賊衆不下萬餘人請添
兵協剿等情臣卽在寒亭紅楊樹各防抽撥兵

勇一千三百人飭參將周天孚等帶往涇縣所屬之灣灘章家渡一帶攔頭截剿並於南陵縣防所抽調八百人飭副將陳大富等帶赴涇縣會同該縣督防之副將右玉龍扼要堵禦查石埭大股趨重涇縣萬級黃柏兩嶺之軍爲所隔絕亟應調集兵力挫其兇鋒臣已函商通政使張芾遣軍策應連日灣灘黃池兩防亦屬戒嚴

九月三十日蕪湖與金柱關之賊以礮船駛至政和圩清水河等處均與灣黃偏近雖經防軍擊退第賊巢近在蕪湖所慮大股蠢動更形掣肘臣惟有面面兼籌期無貽誤奏入報

二十日丙辰和春奏言查提督李若珠堵剿紅山

窰逆股寡不敵衆以致逆圍四合晝夜環攻十

月初七日官軍由八埠橋陳家集一帶衝出重圍退紮揚州再圖進剿逆股紛紛東竄前隊已抵甘泉山貓兒墩一帶距城止十餘里並有窺伺瓜州之信我軍堵禦之法北以揚州爲門戶南以瓜埠爲藩籬必須分撥鎮將各予責成方能得力當卽飛咨李若珠整頓營壘就現在揚州兵力會同馬德昭嚴密布置並飭馮子材等

卷之三十一 四三二二二
二二
扼守東溝瓜州等處馮子材帶兵五千人由東
溝馳赴瓜州扼守賊衆已到河邊馮子材率領
官軍極力堵禦一面密派兵勇渡河夾擊賊勢
不支踉蹌敗遁此次逆氛闖入紅山窰李若珠
總統北岸諸軍旣已疏防於前復又潰退於後
咎實難辭相應請

旨將李若珠暫行革職 臣兼轄江北軍務未能先事圖

維並請交部照例議處奏入

上諭內閣曰逆匪闖入紅山窰六合大營被困李若珠突圍而出雖因糧竭無援究屬措置乖謬李若珠著暫行革職仍責令督飭將弁迅速進剿以贖前愆和春未能先事圖維並著交部議處

二十一日丁巳周天受奏言石埭踞匪竄擾涇縣

之查村後十月初三日進犯水東遊擊申明照

帶隊迎敵受傷陣亡副將石玉龍援軍趕到合力攻擊賊仍收回查村臣於初七日親督道員廖士彥等趕抵涇縣賊先以大股進犯南山嶺石玉龍血戰陣亡賊遂分路進撲距縣城僅五里參將周天孚趕赴章家渡截擊行至章家渡逆匪蠡擁而來大股業經過河周天孚督隊併刀衝殺賊勢不支參將林保知府余兆祥等

分路迎殺大挫兇鋒敗匪隔河相持經 臣前往
應援梟水過河前後夾擊賊衆亂竄橫屍枕藉
餘黨連夜逃遁探得該逆復聚查村後岸等處
欲聯青陽石埭踞匪亟須嚴爲之備惟兵力不
敷分布而灣黃一帶時有蕪湖逆船附近游弋
石碓奎潭復有賊氛因將應援太平之副將榮
陞所部七百人調到涇縣派赴前敵咨商張芾

集賢堂大冊卷三十一
三十一
務將副將熊廷芳參將劉仁福兩隊催其速來
俾得及早分路進兵將查村股匪掃除以淨腹
地庶灣沚竹塘寒亭南陵各防抽調之師各歸
各隊免致空虛儘先副將江西建昌營遊擊石
玉龍儘先遊擊申明照應請各加升階從優議
卹以慰忠魂奏八

上諭內閣曰皖南涇縣地方之賊由查村進犯南山嶺

復進撲章家渡經周天受督率各軍應援夾擊賊大潰亂殺戮無算餘黨連夜遁逃著周天受速督所調諸軍痛殲醜類儘先副將江西建昌營遊擊石玉龍戰功卓著於南山嶺血戰陣亡著照副將例從優議卹儘先遊擊申明照亦屢立戰功於水東陣歿著照參將例從優議卹

十六日
壬戌
官文曾國藩胡林翼奏言自古辦

竊號之賊與辦流賊不同辦流賊法當豫防以待其至堅守以挫其銳辦竊號之賊法當翦除枝葉併搗老巢今之洪秀泉踞金陵陳玉城踞安慶竊號之賊也石達開等之由浙而閩而江而湖南而廣西及龔張捻股之分合無定流賊之象也自洪楊內亂鎮江克復金陵逆首兇燄久衰徒以陳玉城往來江北牽掣兵力接濟賊

糧故東南迄未收復耳竊以爲欲廓清諸路必先攻破金陵全局一振而後江南大營之兵可以分勦數省其餉亦可分潤數處欲攻破金陵必先駐重兵於滁和去江甯之外屏斷蕪湖之糧路欲駐兵滁和必先圍安慶以破陳逆之老巢兼搗廬州以攻陳逆所必救誠能圍攻兩處略取旁縣該逆備多力分不特不敢悉力北竄

並不敢一意東顧江浦六合蓋竊號之賊未有
不竭力以護其根本也現擬四路進兵自江濱
而北第一路由宿松石牌以規安慶臣曾國藩
親自任之第二路由太湖潛山以取桐城多隆
阿鮑超等任之第三路由英山霍山以取霍城
臣胡林翼親自任之先駐楚皖之交調度諸軍
兼籌轉運第四路由商固以規廬州調回李續

宜一軍任之袁甲三等原奏恐驅賊北竄請由
光固潁州繞赴北路等語查湘勇久戰江濱於
淮北賊情地勢不甚熟悉能否繞出懷蒙以北
應俟李續宜軍至固始後察看情形再行奏明
辦理至蕭啟江一軍臣曾國藩前經檄調來鄂
日內當已由粵回湘張運蘭給假休息難遽北
來應懇

皇上天恩仍飭蕭啟江來皖俾臣等稍收臂指之助

曾國藩又奏言臣近年屢患目疾醫治迄未就
痊自至巴河月餘兩目作疼兼患頭暈合無仰
懇

天恩賞假一月在營調理

曾國藩又奏言接據荆宜施道李續宜稟稱伊
母病篤乞歸省視自應給假以示體恤現令李

續宜所部各營先行回鄂由商城固始一路進發候該道假滿來至楚豫之交再行相機調度

奏入

上命軍機大臣傳諭官文曾國藩胡林翼曰前因楚軍東下應防匪衆北竄並蕭啟江一軍已准暫留廣西張迎蘭派防郴州諭令曾國藩別籌兵勇本日據官文等奏稱湘勇於淮北形勢未能熟悉尙須俟李續

宜兵到再行察看具奏並曾國藩現患目疾請假各等語曾國藩著賞假一月在營調理該侍郎一路兵勇既待另籌而李續宜亦係獨當一面復因母病給假是四路中已有二路急難進征於皖北待援情形有緩不濟急之勢至所稱先圍安慶兼擣廬州以攻賊之所必救所籌尙爲周妥皖豫徐州各帶兵大員竭力環攻若楚師鼓行而東聲威較壯然必須取道

淮北方不致驅賊北趨前諭於四軍內派出一軍取道光固潁州繞出懷蒙以北之處仍著官文會國藩胡林翼悉心籌酌辦理

二十七日

癸亥

和春奏言逆黨盡銳東趨麴集甘

泉山司徒廟等處十月十一日匪衆三千餘名由揚州西南北三門以迄三汊河步步爲營並於西路潛掘地道馬德昭等登陴守禦轟斃撲

城逆匪不少並於西南各門焚燬逆卡數處十六日官軍三路進發行近賊巢設伏以待一面指揮勁旅越過重濠連破木卡數重馬德昭見官兵得手傳放號礮四面伏兵齊起該逆奪路狂奔當將附近西北賊營十餘座全行踏毀餘逆望西鼠竄馬隊沿途抄截俘斬尤多西路地道四處一律踏平乘勝追勦直抵司徒廟地方

其竄往灣頭蔣王廟之賊亦經官軍殲斃無算
餘賊奔敗回巢逆首陳玉城於十一十二等日
分遣醜類陸續渡江而南竄至金柱關丹陽等
處偪近秣陵關抄截大營後路意圖大逞東壩
溧水情形緊急當與張國樑相商咨令鄭魁士
等相度機宜先爲之備一面督飭將領挑選精
銳無論何處有警立即馳往夾擊並飭總兵劉

季三等扼守金陵南路長牆暨秣陵關等處晝
夜嚴防不准稍有鬆懈至揚州之賊壘經懲創
其膽必寒仍飭李若珠馬德昭等激勵各軍迅
速勦除甘泉山一帶逆壘毋任日久蔓延奏入

上命軍機大臣傳諭和春張國樑李若珠曰賊首陳玉
城復分遣醜類渡江而南竄至金柱關等處現已偏
近秣陵關東壩溧水軍情均形緊急經和春張國樑

咨令鄭魁士等扼要嚴防所籌尙屬周妥惟陳玉城
係狡悍劇賊未始非因揚州兵力厚積未能北竄乘
隙南趨爲避實擊虛之計秣陵關等處爲金陵大營
後路豈容稍有疏虞著和春再行嚴飭將士添派兵
勇伺賊所向儘力勦洗務將此股賊匪悉數殲除毋
令闖入腹地其攻撲揚州賊匪雖據稱望西鼠竄而
賊巢尙屬林立並未遠遁著和春卽飭李若珠馬德

昭等激勵將士乘勝進勦將甘泉山一帶賊壘悉數
攻克毋任日久蔓延

二十九日乙丑都察院左副都御史錢寶青奏言

臣蒙

恩簡派湖北正考官面奉

諭旨湖南湖北軍情令臣詳詢官文回京面奏謹將大

概情形先爲

皇上陳之查湖南自寶慶解圍後餘匪竄入廣西道員
蕭啟江一軍已追向全州一帶屢獲勝仗其張
運蘭一軍現在宜章邊界堵剿廣東乳源等處
股匪防其竄入南境南省大局似可無虞至湖
北軍務現在急須籌辦者以援剿皖省一事爲
最要亦爲最難蓋自上年李續賓三河之敗休
養半年有餘自援湘告捷石牌克復士氣日見

其奮又值江西湖南均已肅清鄂省毋須旁顧
始爲援皖一大機會署撫臣胡林翼親督黃州
大營兵勇取道英山霍山會合原紮該處之參
將余際昌一軍約萬餘人爲一路以副都統多
隆阿總兵鮑超現攻太湖之兵會合道員蔣凝
學一軍力攻太湖斷賊糧道並規潛山約一萬
五千餘人爲一路以侍郎曾國藩所部兵勇會

合現守石牌之糧道唐訓方一軍由石牌進兵
與提臣楊載福水師同規安慶陸軍約一萬四
五千人水軍約六千餘人爲一路調回荆宜施
道李續宜赴援湖南之軍約六千餘人或顧商
固或保黃麻作後起之奇兵爲一路緣楚皖交
界路徑多歧逆匪處處可以抄襲故必重兵齊
發則賊所上竄之路皆我所進兵之路而後可

無內顧之憂署撫臣胡林翼奪情視事總以躬
親行陣爲念而以治民察吏爲不安此次擬親
出英霍固因此路山徑最歧門戶最要然猶不
免金革無避之初心以事理論之當一路之賊
則事小督全軍之餉其事重督臣屢疏請留非
專爲吏事民事實仍爲兵事餉事也竊維李續
宜一軍良將勁卒所向有功其人數亦與署撫

臣所部相當若令進取英霍而以黃州大營爲後路奇兵則移步換形一舉兩得應由督臣與署撫臣隨時妥商至廬州一城實爲皖賊淵藪然其勢未可遽圖此次楚軍分路進攻其出北路者應以六安爲止其出南路者應以桐城爲止迫廬州而不攻則賊無必死之心搏安慶以全力則賊有必援之勢我軍沿江聲勢旣聯使

其來援則廬州賊分不來援則安慶勢孤不得
於彼必得於此且偏而不攻則賊不暇爲北竄
之謀卽江浦六合援賊亦必致力於安慶是不
啻誘堅守之賊而使之野戰也一旦出其不意
六安桐城之兵皆可襲廬州而取之事半功倍
較之專事攻堅者似操勝算以上各情謹就詢
之督臣者證以衆論參以管見先行縷陳伏乞

聖鑒奏入

上命軍機大臣傳諭官文胡林翼曰楚軍援皖之師擬分四路並進布置最爲周妥惟胡林翼身任地方以籌畫全軍餉需爲最要若由英山霍山進剿深入萬山之中於全局情形不能兼顧荆宜施道李續宜謀勇素著其所帶兵勇與胡林翼所部人數相當應令該員進取英霍胡林翼仍在黃州大營爲後路奇兵

既可籌畫餉需兼可策應各路萬不可一意進剿置
地方公事於不顧至錢寶青所稱楚軍進攻各情不
爲無見著該大臣等與會國藩妥爲籌畫務使官軍
互爲聲援確操勝算方爲妥善其由光固潁州繞出
懷蒙以北之軍係爲防賊北竄起見並著仍遵前旨
悉心籌辦